

125/12

Klub Narod i pravda
Klub Naša stranka
Klub SDP BiH
Klub samostalnih zastupnika

Sarajevo, 11.12.2020

SKUPŠTINA KANTONA SARAJEVO
n/r Predsjedavajućeg

Bosna i Hercegovina
Federacija Bosne i Hercegovine
KANTON SARAJEVO

PRIKLJENO: 11-12-2020		
Broj izdavanja	Broj strana	Broj priloga
01	02	49673

Predmet: Prijedlog zakona o izmjenama i dopunama Zakona o organizaciji i djelokrugu organa uprave i upravnih organizacija Kantona Sarajevo, dostavlja se -

U skladu sa članom 160. Poslovnika Skupštine Kantona Sarajevo ("Službene novine Kantona Sarajevo", br. 41/12, 15/13, 47/13 i 47/15) u prilogu akta Vam dostavljamo Prijedlog zakona o izmjenama i dopunama Zakona o organizaciji i djelokrugu organa uprave i upravnih organizacija Kantona Sarajevo.

Predlažemo donošenje ovog Zakona po hitnom postupku, u skladu sa članom 159. Poslovnika Skupštine Kantona Sarajevo, jer se radi o neodložnoj potrebi da se definišu ministarstva i njihove nadležnosti prije imenovanja ministara u novom sazivu. Nedonošenje ovog zakona prije imenovanja novih ministara, izazvalo bi štetne posljedice za društvene interese Kantona, jer bi odgodilo imenovanje izvršne vlasti, odnosno kasnijim izmjenama i dopunama Zakona moralo bi se vršiti razrješenje i ponovno imenovanje ministara.

S poštovanjem,

Prilog: Prijedlog Zakona o izmjenama i dopunama Zakona o organizaciji i djelokrugu organa uprave i upravnih organizacija Kantona Sarajevo – hitni postupak.

Klub Narod i pravda
Klub Naša stranka
Klub SDP BiH
Klub samostalnih za

Na osnovu člana 18. tačka b) i člana 30. stav (2) Ustava Kantona Sarajevo ("Službene novine Kantona Sarajevo," br. 1/96, 2/96, 3/96, 16/97, 14/00, 4/01, 28/04 i 6/13, 31/17) i člana 46., a u vezi sa članom 73. Zakona o organizaciji organa uprave u Federaciji Bosne i Hercegovine ("Službene novine Federacije Bosne i Hercegovine", broj 35/05), Skupština Kantona Sarajevo na ___sjednici od _____2020. godine, donijela je

PRIJEDLOG

ZAKON O IZMJENAMA I DOPUNAMA ZAKONA O ORGANIZACIJI I DJELOKRUGU ORGANA UPRAVE I UPRAVNIH ORGANIZACIJA KANTONA SARAJEVO

Član 1. (Izmjene člana 6.)

- (1) U Zakonu o organizaciji i djelokrugu organa uprave i upravnih organizacija Kantona Sarajevo ("Službene novine Kantona Sarajevo", broj 2/12 – Prečišćeni tekst, 41/12, 8/15 i 13/17), u članu 6. tačka b) se briše.
- (2) Tačka c) mijenja se i glasi: "Ministarstvo komunalne privrede, infrastrukture, prostornog uređenja, građenja i zaštite okoliša".
- (3) Tačka i) mijenja se i glasi: "Ministarstvo za nauku, visoko obrazovanje i mlade."
- (4) Iza tačke i) dodaje se nova tačka j) koja glasi: "Ministarstvo za odgoj i obrazovanje."
- (5) Dosadašnje tačke j) do l) postaju tačke k) do m).

Član 2. (Brisanje člana 8.)

Član 8. briše se.

Član 3. (Izmjena člana 9.)

Član 9. mijenja se i glasi:

„Član 9. (Ministarstvo komunalne privrede, infrastrukture, prostornog uređenja, građenja i zaštite okoliša)

- (1) Ministarstvo komunalne privrede, infrastrukture, prostornog uređenja, građenja i zaštite okoliša vrši upravne i stručne poslove utvrđene ustavom, zakonom i drugim propisima, koji se odnose na ostvarivanje nadležnosti Kantona u oblasti komunalnih djelatnosti, komunalne privrede i infrastrukture, te oblasti prostornog uređenja, građenja, zaštite okoliša, utvrđivanja stambene politike, uključujući i donošenje propisa koji se tiču uređivanja i izgradnje, obnove i rekonstrukcije stambenih objekata.
- (2) U sastavu Ministarstva komunalne privrede, infrastrukture, prostornog uređenja i građenja su Uprava za geodetske i imovinsko-pravne poslove i Uprava za stambena pitanja.

(3) Uprava za geodetske i imovinsko-pravne poslove vrši upravne i druge stručne poslove utvrđene zakonom i drugim propisima, koji se odnose na ostvarivanje nadležnosti Kantona u oblasti geodetskih i imovinsko-pravnih poslova.

(4) Uprava za stambena pitanja vrši upravne i druge stručne poslove koji se odnose na prvostepeni upravni postupak po zakonima iz oblasti stambenih odnosa i aktima o provođenju tih zakona.

Član 4.

(Izmjena naziva člana 15.)

Član 15. mijenja se i glasi:

„Član 15.

(Ministarstvo za nauku, visoko obrazovanje i mlade)

Ministarstvo za nauku, visoko obrazovanje i mlade vrši upravne i stručne poslove utvrđene ustavom, zakonom i drugim propisima, koji se odnose na ostvarivanje nadležnosti Kantona u oblasti nauke, visokog obrazovanja i mladih.

Član 5.

(Osnivanje Ministarstva za odgoj i obrazovanje)

Iza člana 15. dodaje se novi član 15a. koji glasi:

„Član 15a.

„(Ministarstvo za odgoj i obrazovanje)

Ministarstvo za odgoj i obrazovanje vrši upravne i stručne poslove utvrđene ustavom, zakonom i drugim propisima, koji se odnose na ostvarivanje nadležnosti Kantona u oblasti predškolskog, osnovnog i srednjeg obrazovanja.

Član 6.

(Početak rada Ministarstva komunalne privrede, infrastrukture, prostornog uređenja, građenja zaštite okoliša, Ministarstva za nauku, visoko obrazovanje i mlade i Ministarstva za odgoj i obrazovanje)

- (1) Ministarstvo komunalne privrede, infrastrukture, prostornog uređenja, građenja i zaštite okoliša počinje s radom danom imenovanja ministra.
- (2) Ministarstvo za nauku, visoko obrazovanje i mlade počinje s radom danom imenovanja ministra.
- (3) Ministarstvo za odgoj i obrazovanje počinje s radom danom imenovanja ministra.

Član 7.

(Prestanak s radom Ministarstva prostornog uređenja, građenja i zaštite okoliša, Ministarstva komunalne privrede i infrastrukture i Ministarstva za obrazovanje, nauku i mlade)

- (1) Danom imenovanja ministara iz čana 6. ovog zakona prestaje s radom Ministarstvo prostornog uređenja, građenja i zaštite okoliša.
- (2) Danom imenovanja ministara iz čana 6. ovog zakona prestaje s radom Ministarstvo komunalne privrede i infrastrukture.
- (3) Danom imenovanja ministara iz čana 6. ovog zakona prestaje s radom Ministarstvo za obrazovanje, nauku i mlade.

Član 8.

(Rok za imenovanje ministara)

Ministri iz člana 6. ovog zakona imenovat će se u roku od 30 dana od dana stupanja na snagu ovog zakona.

Član 9.

(Preuzimanje državnih službenika i namještenika, arhive, dokumentacije i sredstava rada Ministarstva prostornog uređenja, građenja i zaštite okoliša i Ministarstva komunalne privrede i infrastrukture)

(1) Danom početka rada Ministarstvo komunalne privrede, infrastrukture, prostornog uređenja, građenja i zaštite okoliša preuzima državne službenike i namještenike, poslove, arhivu i dokumentaciju i sredstva rada Ministarstva komunalne privrede i infrastrukture.

(2) Danom početka rada Ministarstvo komunalne privrede, infrastrukture, prostornog uređenja, građenja i zaštite okoliša preuzima državne službenike i namještenike, arhivu i dokumentaciju i sredstva rada Ministarstva prostornog uređenja, građenja i zaštite okoliša.

Član 10.

(Preuzimanje državnih službenika i namještenika, arhive, dokumentacije i sredstava rada Ministarstva za obrazovanje, nauku i mlade)

Danom početka rada Ministarstvo za odgoj i obrazovanje preuzima državne službenike i namještenike, poslove, arhivu i dokumentaciju i sredstva rada Ministarstva za obrazovanje, nauku i mlade, kao i rukovodioca, državne službenike i namještenike Prosvjetno-pedagoškog zavoda.

Član 11.

(Donošenje pravilnika o unutrašnjoj organizaciji Ministarstva komunalne privrede, infrastrukture, prostornog uređenja, građenja i zaštite okoliša)

U roku od 30 dana od početka rada Ministarstva komunalne privrede, infrastrukture, prostornog uređenja građenja i zaštite okoliša, ministar komunalne privrede, infrastrukture, prostornog uređenja, građenja i zaštite okoliša, dužan je donijeti Pravilnik o unutrašnjoj organizaciji Ministarstva komunalne privrede, infrastrukture, prostornog uređenja građenja i zaštite okoliša.

Član 12.

(Donošenje pravilnika o unutrašnjoj organizaciji Ministarstva za nauku visoko obrazovanje i mlade)

U roku od 30 dana od početka rada Ministarstva za nauku, visoko obrazovanje i mlade, ministar za nauku, visoko obrazovanje i mlade dužan je donijeti Pravilnik o unutrašnjoj organizaciji Ministarstva za nauku, visoko obrazovanje i mlade.

Član 13.

(Donošenje pravilnika o unutrašnjoj organizaciji Ministarstva za odgoj i obrazovanje)

U roku od 30 dana od početka rada Ministarstva za odgoj i obrazovanje, ministar za odgoj i obrazovanje dužan je donijeti Pravilnik o unutrašnjoj organizaciji Ministarstva za odgoj i obrazovanje.

Član 14.
(Stupanje na snagu)

Ovaj zakon stupa na snagu narednog dana od dana objavljivanja u "Službenim novinama Kantona Sarajevo".

PREDSJEDAVAJUĆI
SKUPŠTINE KANTONA SARAJEVO
Elvedin Okerić

Broj:
Sarajevo,

OBRAZLOŽENJE

I - PRAVNI OSNOV

Pravni osnov za donošenje ovog zakona sadržan je u odredbama člana 18. tačka b) i člana 30. stav (2) Ustava Kantona Sarajevo, kojim je utvrđena zakonodavna funkcija Skupštine Kantona, kao i da se zakonom Kantona, u skladu s načelima i principima organizacije uprave, utvrđuje ukupna organizacija kantonalne uprave, te člana 46. Zakona o organizaciji organa uprave u Federaciji Bosne i Hercegovine, kojim je utvrđeno da se kantonalni organi uprave i kantonalne upravne organizacije osnivaju i ukidaju i njihov djelokrug utvrđuje kantonalnim zakonom o organizaciji i djelokrugu kantonalnih organa uprave i upravnih organizacija, u vezi sa članom 73. istog zakona, kojim je propisano postupanje u slučaju ukidanja jednog, a osnivanja drugog organa uprave ili upravne organizacije.

II - RAZLOZI DONOŠENJA

Nekoliko je razloga koji opravdavaju nužnost donošenja ovih izmjena i dopuna Zakona, odnosno koji su razlogom izmjene organizacije Vlade Kantona Sarajevo, odnosno nadležnost njenih ministarstava.

Trenutno, Ministarstvo obrazovanja nauke i mladih Kantona Sarajevo obuhvata pet kompleksnih sektora, a svaki od njih obuhvata više oblasti, poput Sektora za predškolsko, osnovno i srednje obrazovanje, Sektora za visoko obrazovanje i nauku ili, pak sektora za saobraćaj i edukaciju. Uporedo s tim radi se o ministarstvu koje „gospodari“ sa 1/3 budžeta, te je odgovorno za preko 8000 zaposlenih u svim sferama obrazovanja i znanost, te za 80000 učenika i studenata. Trenutna sistematizacija ministarstva je zastarjela, i nikada nije bila u potpunosti kapacitirana. S obzirom na velike izazove i reformske procese koji su pred nama, neophodno je stvoriti efikasnu i modernu strukturu kojom će se, bez značajnijeg povećavanja administrativnog aparata, stvoriti svi pred uvjeti za realizaciju zadatih mjera i efikasno sprovođenje zacrtane reforme obrazovnog sistema. S obzirom na širok dijapazon oblasti od predškolskog odgoja, osnovnog obrazovanja, srednjeg obrazovanja, visokog obrazovanja, znanstvenog sektora, saobraćajnog sektora, kao i sektora mladih i oblast obrazovanja odraslih, logičnim se nametnula ideja za podjelom ovoga resora u cilju sprovođenja uspješne obrazovne politike u svim segmentima. Resori su podijeljeni po srodnosti oblasti, ali i na osnovu iskustava dosadašnjih ministara koji su ukazali u kojem pravcu bi takva podjela morala da ide da bi se stvorio efikasan aparat izvršne vlasti. Novonastala ministarstva su Ministarstvo odgoja i obrazovanja, koje obuhvata sektore predškolskog, osnovnog i srednjoškolskog odgoja, te sektor saobraćaja i obrazovanja odraslih i Ministarstvo nauke, visokog obrazovanja i mladih čije se ingerencije naziru iz samoga naziva ministarstva.

Analizirajući funkcionisanje Ministarstva komunalne privrede i infrastrukture, kao i Ministarstva prostornog uređenja, građenja i zaštite okoliša, a koji su ranije činili jednu cijelinu, evidentno je da razdvajanje nije donijelo očekivanu funkcionalnost, nego upravo suprotno. Određeno preklapanje nadležnosti oba ministarstva je dovelo do birokratizacije i usporavanja procesa (npr. pitanje upravljanja deponijom Smiljevići, pri čemu oba ministarstva imaju određene nadležnosti).

Takođe, predlađač se rukovodio i preporukom OHR iz ranijih godina, kojom je od kantonalnih vlasti traženo da se ne povećava broj ministarstava, te imajući na umu nužnost razdvajanja resora unutar ministarstva obrazovanja, a u cilju provođenja reformskih procesa koji su pred nama, procijenio ovakvo rješenje najfunkcionalnijim za Kanton Sarajevo.

III - PRAVNA RJEŠENJA

Član 1. - Ovim članom se mijenja član 6. Zakona na način da se briše Ministarstvo prostornog uređenja, građenja i zaštite okoliša, mijenjaju se nazivi Ministarstva komunalne privrede i infrastrukture i Ministarstva za obrazovanje, nauku i mlade u Ministarstvo komunalne privrede,

infrastrukture, prostornog uređenja, građenja i zaštite okoliša i Ministarstvo za nauku, visoko obrazovanje i mlade, te se dodaje Ministarstvo za odgoj i obrazovanje.

Član 2. - Ovim članom briše se član 8. Zakona, odnosno briše se Ministarstvo prostornog uređenja, građenja i zaštite okoliša.

Član 3. - Ovim članom mijenja se član 9. Zakona i utvrđuje nadležnost Ministarstva komunalne privrede, infrastrukture, prostornog uređenja, građenja i zaštite okoliša.

Član 4. - Ovim članom mijenja se član 15. Zakona i utvrđuje nadležnost Ministarstva za nauku, visoko obrazovanje i mlade.

Član 5. - Ovim članom dodaje se novi član 15a. kojim se utvrđuje nadležnost Ministarstva za odgoj i obrazovanje.

Član 6. - Ovim članom se uređuje početak rada Ministarstva komunalne privrede, infrastrukture, prostornog uređenja, građenja i zaštite okoliša, Ministarstva za nauku, visoko obrazovanje i mlade i Ministarstva za odgoj i obrazovanje. Propisuje se da ova ministarstva počinju sa radom danom imenovanja ministra.

Član 7. - Ovim članom se uređuje prestanak rada Ministarstva prostornog uređenja, građenja i zaštite okoliša, Ministarstva komunalne privrede i infrastrukture i Ministarstva za obrazovanje, nauku i mlade.

Član 8. - Ovim članom je propisan rok od 30 dana za imenovanje ministara.

Član 9. - Ovim članom se propisuje da s početkom rada Ministarstvo komunalne privrede infrastrukture, prostornog uređenja, građenja i zaštite okoliša preuzima državne službenike i namještenike, arhivu i dokumentaciju i sredstva rada iz Ministarstva prostornog uređenja, građenja i zaštite okoliša i Ministarstva komunalne privrede i infrastrukture.

Član 10. - Ovim članom se propisuje da s početkom rada Ministarstvo za odgoj i obrazovanje preuzima državne službenike i namještenike, arhivu i dokumentaciju i sredstva rada iz Ministarstva za obrazovanje, nauku i mlade, kao i rukovodioca, državne službenike i namještenike Prosvjetno-pedagoškog zavoda.

Član 11. - Ovim članom propisuje se donošenje Pravilnika o unutrašnjoj organizaciji Ministarstva komunalne privrede infrastrukture, prostornog uređenja, građenja i zaštite okoliša u roku od 30 dana od dana početka rada Ministarstva.

Član 12. - Ovim članom propisuje se donošenje Pravilnika o unutrašnjoj organizaciji Ministarstva za nauku, visoko obrazovanje i mlade u roku od 30 dana od dana početka rada Ministarstva.

Član 13. - Ovim članom propisuje se donošenje Pravilnika o unutrašnjoj organizaciji Ministarstva za odgoj i obrazovanje u roku od 30 dana od dana početka rada Ministarstva

Član 14. - Ovim članom propisuje se da ovaj zakon stupa na snagu narednog dana od dana objavljivanja u "Službenim novinama Kantona Sarajevo".

IV - DONOŠENJE ZAKONA PO HITNOM POSTUPKU

Predlaže se donošenje ovog zakona po hitnom postupku, u skladu sa članom 159. Poslovnika Skupštine Kantona Sarajevo ("Službene novine Kantona Sarajevo", br. 41/12-Drugi novi prečišćeni tekst, 15/13, 47/13 i 47/15), jer se radi o neodložnoj potrebi da se definišu ministarstva i njihove nadležnosti prije imenovanja ministara u novom sazivu. Ne donošenje ovog zakona prije imenovanja novih ministara, izazvalo bi štetne posljedice za društvene interese Kantona, jer bi odgodilo imenovanje izvršne vlasti, odnosno kasnijim izmjenama i dopunama Zakona moralo bi se vršiti razrješenje i ponovno imenovanje ministara.

V - FINANSIJSKA SREDSTVA

Za provođenje ovog zakona nisu potrebna dodatna finansijska sredstva.



Bosnia and Herzegovina
Federation of Bosnia and Herzegovina

CANTON SARAJEVO
Prime Minister

Broj: 02/01-02-49685-3/20
Sarajevo, 16.12.2020. godine

SKUPŠTINA KANTONA SARAJEVO
NR/ predsjedavajući Skupštine Kantona Sarajevo
gđin Elvedin Okerić

PREDMET: OBAVIJEST, dostavlja se
Veza: Vaš akt broj: 01-02-49673-1/20 od 11.12.2020. godine

U vezi Vašeg dopisa broj: 01-02-49673-1/20 od 11.12.2020. godine, kojim se Vladi Kantona Sarajevo dostavlja Prijedlog Zakona o izmjenama i dopunama Zakona o organizaciji i djelokrugu organa uprave i upravnih organizacija Kantona Sarajevo s ciljem davanja mišljenja u skladu sa čl. 161 i 162. Poslovnika Skupštine Kantona Sarajevo ("Službene novine Kantona Sarajevo", broj: 41/12-Drugi novi prečišćeni tekst, 15/13, 47/13, 47/15, 48/16, 9/20 i 14/20), ovim putem obavještavam Vas o sljedećem:

1. Predmetni Prijedlog Zakona o izmjenama i dopunama Zakona o organizaciji i djelokrugu organa uprave i upravnih organizacija Kantona Sarajevo razmatran je na 106. vanrednoj sjednici Vlade Kantona Sarajevo održanoj 15.12.2020. godine.
2. Nakon diskusije po predmetnoj tački dnevnog reda, prijedlog zaključka koji je podrazumijevao zaduženja resora za izradu mišljenja na dostavljeni prijedlog Zakona nije dobio potrebnu većinu glasova u skladu sa članom 18. Zakona o Vladi Kantona Sarajevo („Službene novine Kantona Sarajevo“, broj: 36/14 – Novi prečišćeni tekst i 37/14 – Ispravka).


S poštovanjem,



PREMIJER

Dostaviti:

1. Naslovu,
2. Evidencija,
3. Arhiva.



web: <http://vlada.ks.gov.ba>
e-mail: premijer@vlada.ks.gov.ba
Tel: + 387 (0) 33 562-068, 562-070
Fax: + 387 (0) 33 562-211
Sarajevo, Reisa Džemaludina Čauševića 1

